

Wy Cornelis van Mierop by de genaden Godes doemproest t Utrecht, doen condit allen luyden die desen tegenwoirdigen brieff sullen sien oft hoiren lesen,

Dat wy by will ende consent der eerweerdige heeren doemdecken ende cap[itte]ll der cathedrael kercke van Utrecht belieft, geconsenteert ende een accord gemaect hebben mit Geurt Henricxz., onsen schout van onsen gerechte van Oestveen,

Also dat Guert Henricxz. In onsen voors[eyde] gerechte iersts daeghs eenen coerenmolen op synen cost, anxt [risico] ende arbeyt doen maken, setten ende timmeren sall, sulcx dat de selve moelen binnen t s jaers na datum van desen ganckbair malen ende wesen sall, wairvan Guert voirs[eyt] ende syn erffgenamen ende nacomelingen alle die proffytten ende [w]insscappen hebben ende prouffiteren sullen,

Wel verstaende ende mit voirwaerden dat Geurt Henricxz. ende syn erffgenamen ende nacomelinghen voirgen[oemd] ons ende onsen nacomelingen ende successoren doempoessten inder tyt voir den wynt ende onsen doempoesdye gerechticheyt jaerlycx tot eenen thiens [tijns, pacht] ende een eeuwige renten geven ende betalen zullen twee hertoch philippus gulden alse vijff ende twintich brabantstuivers voir datum van desen gemunt voir elcken philippus gulden gerekent oft die rechte waerde dair voir inde tyt,

Die betalinge jairlicx ende alle jair op Sinte Martyns avont inden wynter dair van den iersten termyn verschynen sal op Sinte Martynavont snno achtende viertich ierst comende ende alsoo voirt aff elck [jaar] ende eeuwelick sonder eenigerhande afflossinge oft verminderinge des voirs[eyde] pachts overmidts eenig schaede, last, ogemack die op den voirs[eyde] moelen comwn mochte oick van wat saken datter toequam, nyet dairvan uuytgesondert, ten waren dat die voirs[eyde] moelen omwaeyde oft by brande, dat God verhoeden will, verginck soo sal alsdan Geurt Henricxz. oft zyne erfge[namen] ende nacomelingen binnen eenen halven jaire verclairen ende te kennen geven oft zy den voirs[eyde] moelen wederomme optimmeren setten ende doen malen willen, oft nyet.

Ende indien zy des nyet moeghten nemen ende onse naecomelingen die wynt ende onse gerechticheyt wederom aen ons tot behoef onse doempoesdye voirgen[oemt] moeghen nemen ende onsen [...] wille daer mede doen zoe veel wy willen ende anders nyet

Voirt zyn t voirweerden ende conditien wair t sake dat wy oft onse nacomelingen doempoessten t Utrecht tot eeniger tyt desen coernmoelen begheerden te copen, soe sullen wy de voirs[eyde] moelen betalen tot vier goede mannen seggen dair wy ende onse successoren ende Geurt Henricxsz. ende zyn erffgenamen ende naecomelingen elcx twee toe kiezen ende nemen sullen ende wat de vier goede mannen seggen dat de voirs[eyde] moelen waert is, sellen wy oft onse nacomelingen betalen ende voldoen,

Ende wair t sake, dat de vier segsluyden des nyet eens wordden en konden, soe sullen wy oft onse successoren ende Geurt Henricxz. ende syne erffgenamen eenen and[e]re

man kiesen ende wie die zelve andere mit twee oft meestendeel van den segsluyden verclairen ende estimeren sullen wy ofte onse successoren betalen ende voldoen sonder eenich wederseggen ende die corenmoelen vry aen ons tot behoeff onse doemproesty voirs[eyt] ontfangen ende aenvaerden, sonder eenige contradictie bevonden van Geurt oft syn erffgenamen ende nacomelingen, sonder alle arch ende list

Ende des te conden zoe hebben wy doempoesst voirs[eyd] onse ende wy doemdecken ende cap[itte]ll voirgen[oemd] want dit met onsen wille ende consent geschiet ons capittels zegelen aen desen brieff doen hangen.

Gegeven int jair ons heren duysent vyffhondert zess ende veertich opten zestien dach der maentt van novembrie